



UNITAR, UPNM dan PRIHATIN tandatangan MoU tiga penjuru

Oleh [Azhar Shahrulnizam](#) - Oktober 3, 2022 @ 8:38pm
bhnews@bh.com.my



Timbalan Menteri Wilayah Persekutuan, Datuk Seri Jalaluddin Alias, (belakang, tengah) menyaksikan Ketua Pegawai Eksekutif Yayasan Prihatin Nasional (PRIHATIN), Datuk Mohd Aizuddin Mohd Ghazali, (depan, kiri) bersama Naib Canselor UNITAR International University (UNITAR), Professor Emeritus Tan Sri Ir. Dr. Sahol Hamid Abu Bakar, (depan, tengah) dan Naib Canselor Universiti Pertahanan Nasional Malaysia (UPNM), Leftenan Jeneral Datuk Hasagaya Abdullah, (depan, kanan) membuat pertukaran dokumen persefahaman di antara UNITAR-UPNM-PRIHATIN ketika Majlis Menandatangani Memorandum Persefahaman UNITAR-UPNM-PRIHATIN di UNITAR International University, Kelana Jaya. NSTP/AZHAR RAMLI

KUALA LUMPUR: Dua universiti tempatan, Universiti Antarabangsa Unitar (UNITAR) dan Universiti Pertahanan Nasional Malaysia (UPNM) memeterai memorandum persefahaman (MoU) tiga penjuru dengan Yayasan Prihatin Nasional (PRIHATIN) hari

ini, bagi tujuan kerjasama dalam latihan pemindahan teknologi bagi tujuan pengajaran dan pembelajaran dalam talian.

Menerusi MoU itu juga, UNITAR dan UPNM akan melaksanakan sangkutan kepada staf akademik dan bukan akademik, kolaborasi penyelidikan dalam bidang tujuhan berkaitan dan melaksanakan program akademik dan program yang memberi faedah kepada kedua pihak.

Ketua Pegawai Eksekutif PRIHATIN, Datuk Mohd Aizuddin Mohd Ghazali, berkata matlamat pihaknya sebagai rakan strategik adalah untuk mengangkat martabat dan menjayakan program bagi membantu anak-anak keluarga Malaysia mendapat ilmu pengetahuan dan meneruskan pengajian ke universiti.

"Majlis Agama Islam Wilayah Persekutuan (MAIWP) juga menjadi rakan strategik yang banyak membantu menyumbangkan dana bagi memastikan program kami berjaya dilaksanakan. Contohnya seperti penyerahan komputer riba sebagai Bantuan Pendidikan Jelajah Pendidikan Keluarga Malaysia kepada penerima pada majlis hari ini.

"Melalui kerjasama PRIHATIN, UNITAR dan UPNM, pelbagai program dapat dirancang dan dilaksanakan dalam melahirkan pelajar yang mampu berdaya saing, melahirkan modal insan dan juga pemimpin pada masa hadapan dalam kalangan graduan," katanya.

Beliau berkata demikian ketika berucap pada majlis menandatangani MoU PRIHATIN, UPNM dan UNITAR di UNITAR hari ini.

Turut diadakan penyerahan sumbangan daripada MAIWP kepada penerima bantuan Wilayah Persekutuan berbentuk komputer riba, wang tunai dan juga kelengkapan diri.

Majlis juga dihadiri Timbalan Menteri Wilayah Persekutuan, Datuk Seri Jalaluddin Alias; Naib Canselor UNITAR, Prof Emeritus Tan Sri Dr Sahol Hamid Abu Bakar dan Naib Canselor UPNM, Lt Jen Datuk Hasagaya Abdullah.

Sementara itu, Jalaluddin berkata, beliau berharap untuk melihat graduan tidak leka dan cepat berpuas hati dengan pencapaian yang sedia ada.

"Tingkatkan prestasi dan iltizam untuk terus maju dan bersaing di persada antarabangsa. Sasaran kami, graduan yang dihasilkan tidak mempunyai skrol ijazah semata-mata.

"Ketika ini kita mempunyai persaingan yang sangat hebat. Mahasiswa perlu gandakan usaha untuk mencapai kecemerlangan dalam jurusan masing-masing," katanya.